

CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE COSPEITO PARA A MELLORA DO RECINTO FEIRAL MUNICIPAL MANUEL VILA, NO NÚCLEO DE MUIMENTA

O xerente de Turismo de Galicia

DECLARA:

Que esta Axencia Turismo de Galicia formalizou co Concello de Cospeito o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2023.

Que o instrumento convencional ten por obxecto establecer o marco de colaboración entre Axencia Turismo de Galicia e o Concello de Cospeito para a mellora das instalacións do recinto feiral municipal Manuel Vila, no núcleo de Muimenta.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



Segundo.- O Concello de Cospeito é titular dun recinto feiral no núcleo de Muimenta, no que se desenvolve anualmente a Festa da Filloa, actividade de relevancia turística non só a nivel provincial senón tamén autonómico e incluso fóra de Galicia, que vén de celebrar o pasado ano 2022 a súa XXXI edición. A Festa da Filloa de Muimenta, que se celebra desde o ano 1992, naceu como iniciativa para recadar fondos para a organización da Mostra Exposición de Muimenta (Moexmu) –un certame anual de carácter gandeiro, no que ten lugar a Exposición de Raza Rubia Galega e o Concurso de Raza Frisona, ademais de exposición de maquinaria agrícola e unha poxa de gando selecto–, ten hoxe personalidade propia, e recibe anualmente arredor de 25.000 persoas. Grazas a ela, os habitantes da zona devolveron a filloa ao lugar preponderante que lle correspondeu sempre na gastronomía da zona e recuperaron para as súas casas as pranchas típicas na súa elaboración. Foi declarada de Interese Turístico Galego en 2008. Prevese nos vindeiros anos que se incremente a repercusión e importancia desta Festa da Filloa, o que levará aparellado un maior número de asistentes e participantes.

Terceiro.- Coas obras o concello pretende mellorar estética e funcionalmente o recinto feiral, tanto nos acabados coma no pavimento, iluminación, peches e equipamento para poder dar un servizo axeitado ós visitantes e ós expositores.

As obras que se pretenden desenvolver son as seguintes:

- Desmontaxe de peches en deficientes condicións tanto na entrada principal, como na lateral. Estes peches serán substituídos por uns novos de mellor calidade e presenza.
- Desmontaxe do portón de entrada principal. Será substituído por un pórtico de entrada que enmarcará o acceso principal, o que permitirá a instalación de lonas de anuncio das actividades a desenvolver, identificando ademais o nome do recinto.
- Procederase a mellorar o pavimento da zona de entrada así como o camiño no eixe central do recinto, mediante un pavimento de formigón desactivado.
- Procederase á revisión e arranxo das goteiras existentes na cuberta dos postos.
- Procederase á limpeza e posterior pintado das paredes dos postos existentes.
- Limpeza das fachadas do edificio de administración.
- Limpeza e tratamento da estrutura de cuberta dos postos.



- Limpeza e tratamento da cuberta do palco central.
- Recebos e pintados dos postos.
- Recebo e pintado de fachada de naves.
- Instalación de dous aseos accesibles a carón dos aseos existentes.
- Colocación de dous bancos de fábrica na zona de administración e no lateral preto da entrada secundaria.
- Substitución dos tubos de auga existentes.
- Colocación de mastros para bandeiras na entrada do recinto.
- Substitución de toldos existentes.
- Instalación de carteis e numeración dos postos existentes.
- Instalación de iluminación na entrada principal.

Con esta actuación preténdese potenciar un elemento patrimonial do concello, favorecendo o uso e goce do entorno por parte de veciños e visitantes, revalorizando o patrimonio e fomentando o turismo patrimonial como un instrumento de reequilibrio territorial, o que supón a posta en valor turístico da citada infraestrutura.

Que a través deste convenio, outórgase ó Concello de Cospeito unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.



E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

